

## Дўст ҳақида айтилган сўзлар



ISLAM.UZ

дўст ҳақида айтилган сўзлар

09:25 / 06 январь 2072

Али розияллоҳу анху ўғли Ҳасан розияллоҳу анҳуга: «Эй ўғлим, ҳақиқий ғариб бу - дўсти йўқ кишидир», дер эдилар.

Муҳаммад бин Холид ҳикоя қилади:

«Бир куни Абу Сулаймон Доронийга: «Бир одам Африкада яна бириси Самарқандда яшайди. Яна улар бир-бирларига дўст бўлишади (шу мумкинми)?», дедим.

«Ҳа, албатта, (мумкин)!», деди у.

«Қандай қилиб?» дедим мен.

Жавоб берди: «Уларнинг ҳар бирининг нияти агар дўстим билан кўришиш насиб қилса, албатта унинг кўнглини оламан (дўстлик қиласман), деган нарса бўлади. Модомики, нияти шундай экан, албатта у унинг дўстидир», дедилар».

Ҳасан Басрий айтадилар:

«Дўстларимиз бизларга оила аҳлимиздан-да маҳбуброқдирлар. Зоро, улар бизга охиратни эслатишади, оила аҳлимиз эса дунёни эслатишади».

Сайд ибн Мусайяб дедилар:

«Чин дўстларни лозим тутки, уларнинг соясида яшайсан. Улар фароғатда

зийнат, мусибатда эса қувватдирлар».

Абдуллоҳ ибн Масъуд розияллоҳу анҳу дўстлари билан учрашиб қолса: «Сизлар маҳзунлигим давосидирсиз!», дер эди.

Маймун ибн Мехрон айтадилар:

«Дўстлиги сенга манфаат келтиргмаган кимсанинг душманлиги ҳам зарар бермайди».

Дўстлик моҳияти ҳақида адиб ва мутафаккирлар сўзларидан Қачонки, дўстинг сен учун мақому мартабада ўзинг каби бўлсагина дўстлик ҳақиқатига эришасан (Михаил Наъийма (Нуайме)).

Дўстлик маъноси шуки, ўз кароматим, қадру қийматимдан бир қисмини ўйлаб ўтирмасдан ишониб топширишга сени лойиқ кўришимдир (Аҳмад Холид Тавфиқ).

Ҳаёtingга кириб-чиқиб кетувчи ҳар бир кимсага нисбатан дўст сўзини ишлатавермагин-ки, бир кун келиб «дўстлар ҳам ўзгарар экан» демагайсан (Жуброн Халил Жуброн).

Дўстинг сукут қилиб, гапирмай қўйса ҳам сен унинг қалб товушига қулок солишда давом эт. Зоро, дўст-биродарлик сўз ва ибораларга муҳтоҷ эмас (Жуброн Халил Жуброн).

«Дўст» бу жуда қиммат сўздир. Ҳар кимга ҳам айтилавермайди (Пауло Коэльо).

**Алишер Султонходжаев**

Ушбу мақола Ўзбекистон Республикаси Вазирлар Маҳкамаси ҳузуридаги Дин ишлари бўйича қўмитанинг 2023 йил 7 сентябрдаги 03-07/7119-рақамли хуносаси асосида тайёрланди.